

# OMUKWETU



40c

No. 11

ISBN 0-620-06828-0

## A yi keveluluko

Omulongi omukwetu Ester Amupolo (Kanime) e tu tetekele mepipi lyoomimvo 43. Okwa li a kwatwa kuunkundi wolutu pehulilo lyomumvo 1987. Petameko lyomumvo 1988 okwa tameke nga oskola nuunkundi sigo a yi moshipangelo shepangelo mOshakati moka a manene oondjenda dhe 26.3.1988. Okwa ningi mo owala oshiwike shimwe.

Meme Ester okwa li a taambwelwa moombete eti 18 Maalitsa ye nakunyola okwa li wo a thaneke kutya e ke mu talela po moombete eti 30.3.88, nani pehala lyoku ke mu talela po, ota ka tala ko omudhimba gwe. Tate David Namboga Kanime a thigilwa oothigwa dhe (8) aamati yaali naakadhona yahamano.

Tate David haye awike a thigwa monkalo ompe nondhigu. Aalongi poskola otse ne unene.

Tala kep. 7



Okamati otaka leshe Ombimbeli yako ompe melaka lyawo



Omumbisofi nameme Dumeni oye li megalikano pombete yomusita Set Son Shivute, mangan ta lala mOshakati

OSHIPANGELO SHASHAKATI OSHA LALEKE OMUSITA SET SON SHIVUTE A TSIKILE NEPANGO LYE MOSHIPANGELO SHONGELEKI MONANDJOKWE, OKUZA PETAMEKO LYOMWEDHI NGUKA. OMUSITA SHIVUTE OKWA LI A MONO OSHIPONGA 12.5.1988 POKATI KOSHAKATI NONGWEDIVA, SHO OSHIHAUTO SHAWO SHA PUMWA KOSHI-KWAWO, E TA TEKA OKUGULU. OMUKULUKADHI GWE, JUSTINA NANI SHIVUTE NGOKA AWIKE A LI MO NAYE OMO A HULITHILA MOSHIPONGA SHOKA.

PAHOKOLOLO LYOMUSAMANE SHIVUTE MWENE MOMBETE MONANDJOKWE, OTA TI OSHIPONGA SHE NANDO OSHINENE, OKWA MONA EKWATHO EWANAWA NUUWEHAME OTAU ENDE TAU SHUNA PEVI. NGASHINGEYI OTA VULU OKUKALA PO OMUTUMBA. OSHIPONGA SHOKA OSHA LI SHA HALUTHA AANTU OYENDJI, UNENE ESO LYOMUKULUKADHI GWE.

## Ovakwangali va mona Ombimbeli aische melaka lavo

RUPARA, Kavango: Ehangano lokunyanyangida Eembibeli momalaka nomalaka ohani ya dja ko ola yandja Ombibeli aische melaka lorukwangali, moKavango. Elaka olo hali leshwa koilyo aische yOngeleki ya ELCIN moshitukulwa osho, osho yo mOngeleki yaKatoolika kaRooma. Ehokololo alische tala kepannja 6

Oshivilo sheyandjo eli pambelewa osha ningwa komufita Ferdie Weich, Hamushanga ongudumhiti-fi woshilonga shelundululo lEembibeli muNamibia pamwe nomushamane Michael Farchie, ou a hangika metalelopo lopambelewa muNamibia. Metalelopo eli okwa li pamwe naHefolo laye meme Salome.

JUNI 15, 1988

## EPITO LYUUNONA OLI NA OSHILONGA LI VULE OKUKALA KWAUW MII-PUNDI INAAU PITA

Aanasikola ye vule 20,000 yomoosikola dhi vule 40 sho ya thigile po ootundi dhawo moshitopolwa shOwambo, okuza Maalitsa nuumvo, oshinima sha li tashi pwatula omitse dhaavali. Unene tuu nokuli sho sha ningwa pethimbo lyomalongekidho gekonakono enene lyetatamumvo ge li metifa.

Ihe aavali naaputudhi oya li ya taamba ko shoka sha ningwa po, oshoka etompelo olya li lyoshili nolyu ukila ko. Uunona owa li tau pula ookamba dhi hedhe kokule noosikola dhawo, shono shi li muuthemba wawo oku shi ninga, pauvathano lyiigwana lyegameno lyuunona miita, lyomumvo 1899 muHague shomuHollanda. Osho wo aavali nayo okuyambidhidha epulo lyuunona u kongelwe shili egameno, oshinima shi li moongamba dhomautho gawo, ngele nani epangelo olye etha oshinakugwanithwa shalyo.

Oosikola dha tameke ishewe, ngiika hapamukalo naanaa ngoka aanona ya li ya dhiladhila yoyene. Ngaashingeyi aavali otaa fudha ya pepelelwa kuunona wawo wa shuna koosikola. Aataleli wo noshikondo ashihe shelongo, nasho oshi uvite ombili aanona ya shuna miipundi. Naambono ya li ya kanitha iipundi yawo, oya kongelwa omahala. Okanona hoka inaaka pita pehulilo lyomumvo nenge pufuni, oshinima shako kene, osho aaputudhi yi iyogo ngeyi ondjo yuunona wawo.

Ihe uunona mboka kosikola owindji womuwo, owa ka thikamenwa natango komapulo omape. Moosikola dhimwe othina oya ningi onene shi vule nale omolwooyakwawo mboka ya zi palwe (ngele otawo tameke ngaashi wa lombwelwa.) Othina nayo otayi ka vala or ikundu omipe, inaaku tseyika manga odhini.

Aanona yamwe oya ka tameka ootundi kaa ye na oonomola dhomakonakono ngoka haga zi pondje. Ehulilo lyomumvo kuyo otali ka kala ngiini? Mboka ye na oonomola, oya yi mekonakono pwaa na eilongekidho ewanawa. Oongundu dhilwe nadho wo odhi li monkalo ndjoka. Ookamba ndhoka inaadhi za po, natango odha talwa omwigo kaanona mboka taa ka za konima taa ka taambelwa ko. Onakuyiwa mpaka kayi na etegameno ewanawa.

Omapulo gekonakono li nyolve nawa, kwaayehe nomeilongekidho lya yela, omuntu ou uvite kutya oga li taga vulu okuyamukulwa kaataleli pamwe naalangi yaanona, ngaashi ya kwatha nawa

metamekululo lyosikola. Mbaka oyo wo taa vulu okuzimina pamwe noshinyolwa shika, kutya shono shi na oshilonga, haunona u li miipundi, ihe uunona miipundi tau ka gandja iyimati iwawawa pehulilo lyosikola.

Oshizemo sheindilo ndyoka lya li lya ningwa kaanona newi lya kola nolyopambili, otashi sitha ano oluhodhi noonkondo; hakombinga ashike yookamba ndhoka inaadhi hedha ko, ihe nokaavali yamwe mboka taa ekelele uunona, kutya owo wene wi iyonene elongo lyawo molwokwaavulika. Aanona ngele oya li ya puka, aavali mboka oyo ya li ya pukitha uunona sho ya li taa igidha: Tse itatu ka tidhila uunona wetu kosikola, manga ookamba inaadhi hedha ko.

Kombinga yaaleli yoshilongo shika, otashi yecele kehe ngoka u li mekondjo lyokweeta po elunduluko ewanawa moshigwana shika oshithiminikwa, kutya oshinima shi na lela othina, nashi kale oto shi ningi nomukalo gwopambili gwa tya ngiini. Aavali naaputudhi yamwe oya kala ye shi shi shoka.

Ihe oku na wo yamwe kaaye shi shi, mboka ya li ye shi, siku oosikola tadhi pata, oyo wo siku ookamba tadhi tembuka. Mbaka oyo haa fatululile yakwawo taa ti: "Ondjindikila kehe tayi ningilwa SA, Aaluudhe otse atuke tatu hepa. Uunona ngele inau longwa, "Botha" kee na ko nasha, oluhepo olwetu Aaluudhe inaatu longwa."

Omatumbulo ngoka oge na oshili inaayi ihwapo. Aanona oya li ya holola ewi lyawo lya yela, ndyoka inaali mwene-kwa kookamba inaadhi hedha ko, nenge keshunoko koosikola. Nonando ookamba inadhiza za po, aawiliki yadho kape na esiku naye ke shi dhimbwe, kutya oye li mpoka inaa halikila po kuunona uushona nokaavali.

## WAA PANDULA NOYAKA

*Otandi holola epandulo enene kuNampongo, sho a yamukula oohodhi moshigwana shaAwambo, unene tuu pengwandjagulo lyaakulupe petoambo lyiimaliwa yopenzela. Aakulupe ya kala nokuyemata okuundagulwa kaantu yoondjembo.*

*Ngashingeyi omandengu goshilongo, naapeha yoyene yomikunda, oyo ne yi ikwatela ko taa pungulula oshigwana shaKalunga, ngaashi ye shi pewa uusita.*

S.Akoko  
Okaku

## A KWATWA PO

Omunangeshefa Petrus Haipambu Shilongo, Ohamuti popepi nOkalongo, okwa kwatelwe po 7.5.1988, manga a li mondjila u uka kegumbo ta zi kOshakati. Pahokololo lyaakali yomomukunda, Ohamuti, omusamane Haipambu okwa kwatwa po kaalumentu yatatu ye li momizalo dhuukwashigwana taa hingi okahauto kolsuzu.

Moshiningwanima shi lili omukuluntusikola meme Eva-Liisa Shitumbe, okwa yahwa okusa kaalumentu yaa shiwiki 7.5.1988 lwopohetatu yongulohi. Inaku tseyika we sha koshiningwanima shoka. Nakusa okwa li gwoposikola puNicodemus HP.

## Omatokolo amwe Elelongeleki leti 27-29.4.1988

154/88

Elelongeleki ola hoolola okangudu kokukonakona oshinima sheyapulo lovakainhu moufitaongalo, ava vomadina taa landula: Matti Amadhila, Heikki Ausiku, Adelheid Hauala, Hilma Tshilongo Pauly, Hosea Iyambo, Petrina Shiimi na Tomas Kalumbu. Ulla Nenonen omuponhele wawu ta mono omaimbo.

176/88

Elelongeleki ola pewa efaneko lenenepeko lofikola yokOshigambo ngaashi la fanekwa kokangudu komatungo neeprojekta. Elelongeleki ola popila nola koleka efaneko lenenepeko ngaashi la fanekwa oyo pu indilwe oimaliwa yokutungifa kuSweden ile pamwe pe lili.

187/88

Omolwonhumbwe yosekundofikola yOngeleki koKavango, Elelongeleki ola diladila pu kongwe okakomitiye kowina ka ninge omalongekido. Okangudupitifi kElelongeleki otaka indilwa ka faneke omadina oilyo yokangudu. Osho yo okambunga kaKavango otaka indilwa ka tume omadina avali ovakalelipo vaKavango mokakomitiye.

194/88

Elelongeleki ola lesa ombapila yomubishofi omukulunhu wOngeleki onghwaLuther muSoomi, John Vikstorf omo ta holola epandulo komhito yetalelopo laye kOngeleki yetu. Ngaashi omubishofi ye mwene e shi holola ombapila yaye, etalelopo ola koleka oukumwe pokati kOngeleki yetu nOngeleki onghwaLuther muSoomi.

197/88

Ohamba yoshilongo shaUkwangali, Hompa Daniel Sitetu Mpasi okwa holoka mElelongeleki oyo e li kunde. Okwa tumbula kutya okwa holoka ashike oyo a mone Elelongeleki ye a holole euditopamwe laye noshiwana shokOwambo omolwomaudjuu mahapu unene taa hange ovahnu, ngaashi a ulike koshiponga shoboma yomOshakati 19.2.1988.

Hompa okwa holola kutya oku udite oshisho shinene molwomaupyakadi omoshilongo shetu, ndele ye okwa itavela kutya otaa ka xula po. Omunashipundi A. Kaulinge a tumbulila ohamba epandulo eshi ye liyandja okuhepa pamwe noshiwana shayo mefimbo lidjuu.

198/88

Elelongeleki ola tambula nepandulo okambo kEkotampango nOmaufomhango ka holoka ka nyanyangidwa. Oilyo yomaongalo otai indilwa i lilandele okambo ngaashi ka ufwa ka longifwe okutameka 1.1.1985. Omolwomapuko a dimbulukiwa, Elelongeleki otali indile Oshinyanyangido shi nyanyangide ombapila yomapukululo yo i tulwe mokambo.

201/88

Elelongeleki ola lesa ombapila yepangelo laCaprivi tai shiivifa, kutya eindilo lOngeleki yetu okulonga oshilongatumbo moCaprivi ola tambulwa nomuwiliki wOngeleki yetu ota teelelwa a ka talele po diva Caprivi, ye a twaalele omafano omatungo taa pumbiwa.

206/88

Elelongeleki ola lesa ombapila yaMatrone Aletta Ngaikukuete ta shiivifile Elelongeleki, kutya okwa lunduluka mo moilonga youmatrone woipangelo ya LMM, yOngeleki nokwa ningwa omukulunhu woipangelo aisho mOwambo okutameka 1.4.1988.

Elelongeleki eshi li he na nghe li ninga, ole shi dimina. Meme Ngaikukuete okwa ya ponhele yaMatrone Ndamono Shanghala ou a xulifile oweenda waye moshiponga shoboma mOshakati 19.2.1988. Elelongeleki ola pandula unene keyakulo laMatrone Ngaikukuete mu LMM notali mu halele epuniko laKalunga moshilonga shaye shipe.

# NAMIBIA OTALI SILE UUTHIGA WOYINAKULU

**Omukwaniilwa Ahab okwa haluka epya lyaNabot ndyoka lya li ashike lye egamathana nolye. Omukwaniilwa okwa kala e na omapya ogendji ihe okwa li a pumbwa natango ekwawo. Onkene okwi ithana Nabot e mu lombwele kutya ote mu futu iimaliwa ngele ote mu pe po epya ndyoka nenge e mu pe lilwe.**

Ahab okwa li omukwaniilwa, neindilo lye ku-Nabot olya li li uvitikiwe ko. Aakwaniilwa, ookayamukulwa, naaleli aakukutu osho ya kala nomukalo gwokupula iinima yaathigona.

Nabot okwa li e hole unene epya lye nokwa li a hala oku li dhiginina li kale ngaaka lyaanegumbo lye. Paushili, Nabot okwa li e na eitaalo kutya okudhiginina epya lye, osha li ekumagidho lyOmuwa, ngaashi sha nyolwa membo lyoveta lyaMoses 3 Mos. 25:23-28.

Nabot osho she mu tinditha shoka kee li gandje po. Okwa lombwele omukwaniilwa kutya ina hala iimaliwa noina pumbwa epya lilwe, ita gandja po uuthigatendelwa we kuyalwe, na kale omukwaniilwa.

Nabot okwa li u uvite ngaaka kutya, paveta ya-Kalunga oye e na oshinakugwanithwa shokudhiginina uuthiga wezimo, waashono shonale, shongashingeyi nomonakuyiwa. Andola Nabot a ziminine ethaneko lyomukwaniilwa, ando a shundula ngaaka aanegumbo lye, ya kale ye endjelela ashike komukwaniilwa. Onkene a lombwele omukwaniilwa Ahab.

**“Oshitsambe onde shi thigulula kootatekulu. Omuwa ne shi keelele ndi shi ku pe.” ov. 3.**

Eyamukulo kalya li ewanawa komukwaniilwa. Oye omukwaniilwa ihe ka li omulumentu omuyuuki. Okwa li e na efupa noina simaneka uuthemba waNabot sho ta dhiginine eyana lyezimo lye. Omukwaniilwa ka li omuleli ngoka e shi okugamena uuthemba waapiya ye. Onkee kekwaatho lyomukulukadhi gwe Isebel omukwaniilwa okwa longitha uumbudhi okudhipaga Nabot. Nabot okwa lundilwa elundilo ewinayi komukulukadhi nokwa dhipagwa a fa omuna-ndjo.

Ihe shono hasho sha li ehulilo lyehokololo. Kalunga okwa li a tseyashihe shono sha ningwa po, nokwa tumu omutumwa gwe Elia komukwaniilwa Ahab, e mu lombwele kutya okwa dhipaga nokwa kutha po eliko lyaantu. Mpoka oombwa dha lathale ombinzi yaNabot opo mpoka wo noyoye otayi ka lathwa koombwa.

Kutse oyendji muNamibia ngashingeyi osho tu uvite kutya otwa fa egumbo lyaNabot Omuyesrieli. MuCassinga, oomvula omulongo dha piti, omukwaniilwa Ahab okwa dhipaga aantu yetu, aalumentu, aakiintu nuunona, ya dhipagwa omulape ku SA.

Ngaashi naanaa Nabot, Aanamibia mboka ya sile moCassinga nooyakwawo oyendji ya gandja oomwenyo dhawoomolwemanguluko lyoshilongo shawo, oya tindi okugandja po uuthiga wooyinakulu, nashi kale okondando yiimaliwa nenge okusha shilwe shi ili.

Oyo pamwe natse otwa gandja eyamukulo lya yela, kutya aawe, itatu taamba ko ethaneko lya SA, kutya a topole oshilongo shetu momavigumbo, moka tatu kala aluhe twę endjelela kuye nokomathaneko ge.

Ihe etokolo ndyoka lyetu, oyo tuu lya tulitha oomwenyo dhetu moshiponga. Ngaashi Ahab, SA okwa uvu nayi keyamukulo ndyoka okwa si ondjahi nokugeya. Oku uvite otatu mu hindi, okwa landula Aanamibia nomuupongekwa nokwe ya dhipagele mo, omathele nomathele.

Aanamibia mboka otatu ya lili nohole itaayi hulu, otatu ya simaneko. Oya ningi aahokololambinzi yemanguluko lyoshilongo shetu. Oya tindi ya mana mo, opo yaa ningwe aakwashigwana aayeni mevi lyawo lyuuvalwa. Osho she ya dhipagitha.

Iita yemanguluko otayi kondjo natango muNamibia nomuAngola. Sigo onena ndjika Aanamibia otaa si omolwemanguluko tuu ndyoka ya hala. Ahab ina gwanenwa natango keso lyomathele ogendji, oshoka sigo okesiku ndika, Aanamibia oye na okumo okuthikama ya kola omoluuthemba wawo, nokupula uuyuuki, ombili, emanguluko lyoshilongo nemanguluko lyokwinyenga nokupopya. Otwa tinda okugandja po uuthiga wookuku. Kalunga oku tu hole, tse aadhinwa Aanamibia Kalunga okwa gama kutse.

Tse mboka twa zi kOraata yOongeleki muNamibia, otu shi shi, kutya Engelanda okwa tseyika nawa yina yopalamente, ehala ndyoka sigo onena lya tseyika kutya olyo omugameni guudemokoli.

Ongoye (Britania) omutango okutota Magna Carta, onkee wa li u na okukala enyakwa lyuudemokoli muuyuni auhe. Ihe owa mwenena omathiminiko gAanamibia sho taa thiminikwa ku SA omoluuthemba wawo. Otatu kongo Elia, ihe osha fa kutya kape na nando ogumwe mepangelo lyoye ta pulakene shono tse Aanamibia tatu shi ningilwa.

Odhoshili tuu kutya muuyuni muka kamu na Elia ngoka ta vulu okukondjitha epulo lyaAhab, moshinima shino, a lombwele epangelo lya SA; owa dhipaga, nowa kutha po eliko lyaantu, sha gwana, etha Namibia li manguluke?

Peha lyomutumwa gwaKalunga Elia, otwa fa ashike tatu mono Isebel ngoka ti imanga kumwe nuuwinayi. Otatu mono ashike omuntu ngono ta kwatha Ahab opo a mone shono ta kongo. Isebel ngoka ta gandja iimaliwa opo iilonga yokutunga omavigumbo yi tsikile. Omuntu ngoka ta kwatha mokudhipagitha uunona wetu.

Katu na enyanyu mukupopya omatumbulo gaty ngeyi omakukutu, ihe otatu si nokaku na Elia oku tu kwatha. Katu na Elia nena muBritania. Tse itatu ka zimbuka okukuga onkugo, oshoka otatu si dhoshili.

Ngashingeyi oomvula omulongo SA e tu kwata ombambyona, sho kwa tungwa eutho lyemanguluko lyaNamibia lyonomola 435 kiilongo itano yuuninginino, moka mu na wo Britania.

**1 Aak. 21:1-29**



Otatu kugu notatu igidha kungoka ta vulu okulombwela epangelo lya SA: “Mpoka oombwa dha latha ombinzi yaNabot, opo wo mpoka oombwa tadhi ka latha ombinzi yoye.”

SA ngele okwi itedhulula, itaku ka kala we omadhipago, omayugo geyana. Alikana medhina lyaJesus, inamu gama we kungoka ti indile tu gandje po eyana lyuuthiga wookuku.

Moneni omukumo okupopya oshili. Zaleni ondjatha yaElia mu kwathe Namibia mu gamene uuthiga we, opo aamwameme mboka ya sile muCassinga yaa se osima.

(Euvitho lyomusita Matti Amadhila medhimbuluko lyesiku lyaCassinga, ngaashi e li uvitha mOngeleka yaAnglikana muWestminister Abbey, muBritania.)

## O, CASSINGA! O, CASSINGA O, CASSINGEEI

4.5.1978 — 4.5.1988

### EEDULA 10 KONIMA YOCA-SSINGA

paP.O.H.A.Haufiku

O, Cassinga, Namibia ite ku dimbwa mondjokonona Vietnam, Namibia ita efa kutangumuna Onhele ya li ya fewa, ndele ya shituka ohonde Ehenge la li lifuula, ndele la ninga ongode Tu ke lilekeni pale, ye a kale a tulumukwa Tu yeni kokulekule, opo ye ta fudifwa O, Cassinga, Namibia oku ku na mehistolli.

O, Cassinga, Namibia ite ku dimbwa mondjokonona Vietnam, Namibia ita efa kutangumuna Efiku 4. laMai 1978, ola li Elondo lOmukulili Efiku la fimana paNgerki olo omambo kovakelefiti Namibia naAngola aveshe ove li teelela O, Cassinga movakalimo navo yo ove li hafela O, Cassinga, Namibia oku ku na mehistolli

O, Cassinga, Namibia ite ku dimbwa mondjokonona Vietnam, Namibia ita efa kutangumuna Haaveshe va li melondo, omadiladilo e lipenga Hamunhu keshe a li momambo, omahalelo inae lifa Momutima waumwe omwa kakanya ehanauno Momwenyo waa mwa yada engungumano O, Cassinga, Namibia oku ku na mehistolli.

O, Cassinga, Namibia ite ku dimbwa mondjokonona Eenghali muNamibia alishe kadi na omupenduli Oshidimbi medu letu, kashi na omuyakuli Ou ta ti, tate, ou ta ti, meme, ou ta ti kaume, aveshe oko wa ningina Omafele ahetatu a fya, oshiwana ashishe ofilu Omaendo-mbila e li pale itashi eta omuxupu Okuhelitalela mwene ooli, okataula otaka lyana O, Cassinga, Namibia oku ku na mehistolli.

O, Cassinga, Namibia ite ku dimbwa mondjokonona Embakumbaku tali lape ongo tali hade oshingoli Haihambo yomatudi tali undula, la fa tali kongo ongopolo Etale lile lekumwangobe olo ombila yOvacassinga Ekelo la kula la mbwalangandja olo eendo lOvalaule Itashi kofifa mudali, ohonde otai londo Itashi tulumukifa omuneumbo, omutima otu denge O, Cassinga, Namibia oku ku na mehistolli.

Tala kopardja tali landula

# UUKOLONI NOMALOVU MONAMIBIA

Onda tukuluthwa ndi nyole sha koshini-ma shomalovu moNamibia. Aniwa edhina lyombwa okumukweni ho li uvu. Etukulu-tho ndyoka olya ziilile miipopiwa ya holokele moshifo shOmukuni gwaMaalitsa 1988 pomapandja 2-3, 16 ngaashi ya nyolwa ku dr Ojutkangas, Libolly Haufiku naFestus Ashipala.

Ihe manga inaandi ya nadho kokule, onda hala okudhimbulutha aaleshi opo ya leshe embo lyedhina, Enota ile Ondjala? Iya nyolwa ku-Veikko Munyika. Ondi inekela otaa mono mo sha tashi kwatha okudhiladhila omukundu gwotombo niikolithilovu yilwe moshilongo shetu.

Odhoshili kutya oshigwana otashi siikile eyulu, nolwindji inashi dhimbulula oshiponga tashi ziilile momalovu ngaashi Ashipala ta ti: "Oshigwana otashi nu omalovu .... ngaashi omeya noinaashi dhimbulula, kutya ogo uuzigo mboka tau yonagula iilyo yolutu .... nomakwatathano naantu ooyakwawo."

Otandi zimine pamwe naye. Ihe onda hala wo okugwedha ko kutya haayehe taa nu yaa shi shi kutya omalovu ogo uuzigo. Nooministeli otadhi kala ngaa kaadhi shi shi shono? Ope na sha shilwe oshinene shoka shi na okutalwa mekwatathano nomalovu noku ga nwa.

Shoka sha etitha ombepo nombwiyu yokunwa mAanamibia, osho shoka Dr. Ojutkangas inaa tumbula. Sho osho nee shoka Haufiku ta popi, kutya osho ukoloni nokwaancipangelo lyoshigwana. Shoka osho shoka sha teya po omalandulathano wo galwe moshilongo.

Onkee Haufiku oku li mondjila sho ta ti: 'Ano egandjo lyuusama ngele tali gandjwa shi na sha nomukundu gwiikolitha moNamibia, oku na okudhiladhilwa nawa kutya, oshike naanaa sha eta uupyakadhi wa tyangaaka.' Sho shoka sha eta uupyakadhi mboka osho nee nda hala ndi popye mombapila ndjika.

Ishewe okutya, "ayehe oyi itaala ..... iikolitha otayi gandja uukolele," nenge "ayehe" otaa mikisa," paOjutkangas, kashi shi shoshili noka-shi li mondjila. Aanamibia haayehe taa nu. Hapo inaku ningwa ngiika ekonakono lyowina li yalule omwaalu gu thihe peni gwAanamibia tagu nu. Eeno, omukundu opo gu li noyendji omo ye li taa ga thipi dhoshili. Ihe oku na wo oyendji itaa nu nenge taye ga longitha pamukalo gu li hwepo.

Okutala oshinima shomalovu moNamibia otu na okushuna kashona konima. Tu tale oohedhi dha etelelwa kaazaazayi yokuEuropa nokombe-po yuukoloni, yethiminiko noyuupika wAatiligane mboka ya eta aniwa eputuko "kaapagani" yaAfrika. Aatiligane sho ya thiki koNamibia, inaya adha Aanamibia oombwiyu dhomalovu.

Aatiligane sho ye ya kuAfrika okuhakana iilongo nokukonga aapika ya ka longe miikahanwalongo yaEuropa komanenevi galwe — unene tuu kooAmerika, oya longitha wo omalovu guuzigo okulanda aapika. Ngoye dhimbulukwa nee nokutya ekongo lyaapika olya adhele sigo okoNamibia (unene kombinga yokOwambo).

Aaputu sho ya hakana Angola, oya etelele omalovu giikolitha yoonkondo noyuuzigo (owalende, ookostantinyu noolambika dhilwe). Aaputu miineya yawo nomuufudhime wawo, oya heke aakwaniilwa yomOwambo ya lande omauzigo ngoka yo inaye ya fatulila uukwatya woshikalimo.

Oshoka ngele oye shi ningi, nena kape na ngoka ta panda nota landa iikolitha yawo. Onkee aakwaniilwa mbeyaka oya landitha aapika owalende niikolitha yoludhi kehe ya li tayi monika kAaputu.

Manga Aaputu taa landitha owalende yawo kuumbangalantu waNamibia, yo Aandowishi osho taa ningi kuumbugantu waNamibia — sigo AaEuropa mbaka ya tsakanene mokulanditha oowalende dhawo moshilongo ashihe shaNamibia. Oto ti nee uusitola wooCharles

Anderson kOndonga pomumvo 1866 kawa li wa kwatelwamo ngiika nomakende?

Aayeuroopa mbaka oya li ye shi shi nawa oshilanduli shokunwa omalovu ngoka kutya, osho eyonuko lyomalutu noomwenyo, ihe oshili ndjoka inaye yi holola, opo yaa yone omalanditho gawo. Ishewe elalakano lyawo enene kalya li shili okuhupitha oomwenyo dhaAfrika, ihe oku ya thipa noku ya pangela.

Ngele ando oya se po ayehe, osha li ekwatho enene kAayeuroopa opo ya lale ongali iilongo. Onkee oya tala oshipu okupangela onkolwe noku yi longitha uupagani kehe wa hala, inaayi mona po nenge inaayi dhimbululapo sha. Onkee okukolitha Aaluudhe mbaka otashi kwatha okuyelutha oonkondo dhepangelo lyAayeuroopa nolyoshipa oshihiligane. Onkee "naa kolwe tse tu ya pangele ngaashi twa hala." Edhiladhilo opo li li mpoka!

Sho iilumbu ya lala pomitima dhiilongo yaa shi yayo, oya mono ompumbwe yaaniilonga opo ya thihe nawa Africa. Itashi piti nee okulongitha onkolwe yi etepo sha. Onkee moNamibia sho Aaluudhe oyo ye na okulongela Aatiligane, go omalovu ga adhika taga indjipala, okwa talikwa onawa Aaluudhe yaa ethelwe unene momalovu, opo iilonga "yaahona" yaa lale.

Shika osha fala mpoka opo oveta yomalovu yomumvo 1920, oshitokolitho 6, okatopolwa 71 yi totwe. Oveta ndjika otayi indike Aaluudhe yaa lande yo yaa nwe omalovu guuzigo. Kakele owala iilumbu noombaati li oyo ya li ya mangululilwa okunwa nokuhumbata owalende.

Etompelo olya li mpoka kutya Aaluudhe oye na okulonga (elalakano haku ya kaleka ando nawa); Aatiligane kaye na mbudhi oyo aahona nando naa kale ya kolwa itashi imbi iilonga yi ye komeho, oshoka iilonga yawo okuulika owala omunwe ye Omuluudhe ta tondoka a ka tale shoka tashi ulikwa. Oombaati kadha li dha yalulilwa unene mongundu yaaniilonga pethimbo mpoka. Yo otaa vulu okulanda nokunwa.

Omutiligane nenge ombaati tayi landitha omalovu kAaluudhe oya li yi na okufuta iiponda 50 nenge oomwedhi ndatu mondholongo meyo-nyotango, oshoka omuntu a tyangaaka okwa talikwa ota shunitha uukapitali monima. Egeelo lyeyono lyokulanditha omalovu kOmuluudhe gweyulu efupi, otali indjipalekwa lwaali nenge lutatu nakuyona ngele ta monika ondjo olwindji.

Okatopolwa 72 koveta tuu ndjoka ya tumbulwa metetekelo otaka ti Omuluudhe kehe ta itsuwa ta nu nenge a hambata iikolitha (omalovu) yaahona — kakele shila e na elombwelo lyandohotola nenge a tumwa komuhona — ota futithwa iiponda 20 nenge oomwedhi 3 mokakuma.

Oveta 48 yomumvo 1921 natango otayi ngambeke okunwa iikolitha kAaluudhe. Ihe momumvo 1922 iilumbu 9 noombaati 2 oya li ya monika ondjo sho ya landitha omalovu kAaluudhe.

Tashi kumitha osho shoka kutya omwaalu gwAatiligane ogwa li omushona. Ihe momumvo 1922 omwaalu gwiikolitha gwe etelwe moNamibia ogwa li oongalona 16,674 dhomaviinu, 17,969 dhoberendi, 6,664 dhowisiki, 661 dhorama (Rum) nondjiina, 3,836 dhiikolitha yilwe

Tala kep. 5

## Da dja kep. 3

O, Cassinga, Namibia ite ku dimbwa mondjokonona Ongula yElondo lOmukulili, endilili otali ingida Omene yefiku leyeluko, yomushindi wepilangi otai pombola Kofeni mwa tulumukwa, Vietnam twe i teya po Kumukeni tamu mbonyoka, Vietnam ombonyombonyo Momambako omayava odila, ewi lOmukwanyama ola yela Nepopyo mukule laNelomba, lomunhu waKanhene otali mbolongodja  
O, Cassinga, Namibia oku ku na mehistoli.

O, Cassinga, Namibia, oomeme nootate omo va fyaala  
O, moCassinga, ovana novatekulu omo va xulila  
O, moCassinga, omahewa nookaume va nangala  
O, moCassinga, omapenda neefule da mwena  
O, moCassinga, Ovanamibia vahapu va tonyenwa  
O, moCassinga, omafele ahetatu a dipawa  
O, Cassinga, Namibia oku ku na mehistoli

O, Cassinga, Namibia ite ku dimbwa mondjokonona Edipao laCassinga, halo exulilo lekondjo Ombilatale yaCassinga, hayo ya etifa efidano Eedula omulongo da ka pita, oita otai pwakele Kudja opo katec ongaha, ohonde otai tika. Sha halika hano oshike? Emanguluko loshitunda Sha pumbiwa mbela oshike? Ellipangelo ledu eli  
O, Cassinga, Namibia oku ku na mehistoli.

O, Cassinga, Namibia ite ku dimbwa mondjokonona Shiwana shaNamibia, oye hano omupopili? Embunga nye dedu eli, oye mwa luka Omwaameni? Ou a londa nOvacassinga, oye omupopili wedu eli Kaume a ya pamwe novadipawa, oye Omwaameni wetunda tu li Shamha ngaho mwe mu linekela, emanguluko otali ya Shamha nye mwe mu twa omutwe, ellipangelo omoduka  
O, Cassinga! Namibia oku ku na mehistoli



Omulongi Paulus Haufiku ngoka a lila oosa dhaCassinga

(mbyoka tayi ithanwa "liqueurs and methylated spirits".) Aatiligane oyo ngaa ya mana okunwa oongalona adhihe ndhono momumvo?

Ashipala okwa hokola kutya sigo olwopo 1960 opwa li ngaa pe na engambeko lyomalovu mokati kAaluudhe. Epulo oli li mpoka: Omolwashike engambeko inaali dhigininwa? Omolwashike lya kanitha oonkondo? Otu na okudhimbulukwa shoka nda popi metetekelo kutya, Aatiligane elalakano lyawo naashoka ya hala osho okupangela nokuthipa Aaluudhe. MoNamibia momumvo 1960 omo moka Aanamibia ya dhimbulula sha yela uulingilingi wAatiligane miinima oyindji — itatu yi popi nena. Onkee Aanamibia oya toto omahangano gokukonga uuthemba wAanamibia ayeche — ngaashi oSWANU noSWAPO sho ya totwa omumvo tuu ngoka. Unene tuu SWAPO ngoka a li a guma aaniilonga okwa halutha Aatiligane nayi.

Etoto lyomahangano ngaka osha penduthile Aatiligane kutya, ngele oya tsikile okungambeka iikolitha, nena iilumbu otayi kala nuudhigu wokupangela aantu inaa kolwa yo oya hala emanguluko. Onkee oya tala kutya tashi ya kwatha osho okweethapo, opo Aaluudhe ya kolwe yo ya ze oondunge nomaiuvo. Mokukolwa moka nombepo yokuyambidhidha omahangano ngoka otayi kana. Osho Aatiligane ya dhiladhila ngaaka.

Kombinga onkwawo, Aatiligane oya hala aaniilonga — ihe hankolwe. Otaye shi ende ngiini? Oye shi ende ngeyi: Omumvo 1964 omavigumbo oga thikamwa ge endeletwepo (nonando okutula Aanamibia momavigumbo oshinima sha dhiladhilwa nale pakangundukonakono kaDrew naKolonela Kruger kaJuni 1921 — ye shi ninge pamulandu gwoveta yaSouth Africa yomumvo 1913 ndjoka haku tiwa "Union Native Land Act.") Elalakano: Tula Aaluudhe momavigumbo. Fala iikolitha komavigumbo. Opo nee kutha ko yamwe. Sho shi kale: Yamwe sho taa kolwa komavigumbo, yo yamwe otaa longele Aatiligane inaa kolwa kondhalate "kevi lyAatiligane." Pamukalo gwa tya ngawo, uukapitali otawu yi komeho. Yo mboka itaa longo oya kolwa nethimbo lyokuyambidhidha ooSWAPO dheni ndhono kaye li na we.

Oshinima shika Aalange otaye shi koneke nawa. Sigo okonima owala yoomvula oonshona dha piti, omalovu kaga li ga ha unene kOlange. Ihe nkene tuu kwa monika kutya nani Aalange otaa yambidhidha ekondjelomanguluko, mbalambala Olange yo otayi patululilwa iikolitha sigo onena ndjika. Ashihe otaye shi ningi okuvudhamo ombepo nehala lyemanguluko mAanamibia.

Nena otu li peni? Mpoka tu li nena itashi ti kutya Aanamibia okaaya wete omukundu gwokunwa gwi itila moshigwana. Aawe, oshi wetike. Okutya owala mboka taa ipula nasho oyo mboka itaa li omagadhi guukoloni. Yo mbaka oyo wo kaaye na iimaliwa noonkondo okukwathitha uupyakadhi u hule po. Epangelo ndyoka lyuukoloni li li moshilongo oyo tali longitha omalovu ongashimwe shomiilwitho yalyo opo li tsikile uukoloni. Ito li tegelele li itete omuligu lyolyene.

Yo ishewe mboka ya tulwa po aniwa ye tu kalelepo oyo tuu mboka inaa itula mo okudhiladhila kutya okukondjela oshigwana otashi vulika oshihwepo shi vule oku shi landithapo noku shi kengelele. Onkee otatu tsikile ngaaka nokukaniitha omanga aafukulume taa likola mokundjika nokufumvika omayego gawo moontumba dho-

## E TU TETEKELELA

Meme Anna Lusie Namutenya Hasheela omonakadona wa meme Mirjam natate Andreas Mungungu, okwa dalelwa mEndola eti 4.8.1943. Pakudimbulukwa efiku ledalo laye, okwa tumbula mwene ta ti: "Omwenyo wange hambelela Jehova, ove ino dimbwa ouwa washa ou e u ku ningila." Pakudimbulukwa eshasho laye eti 5.9.1943 okwa li a tumbula: "Tanga Jehova omwenyo wange." Pekoleko laye efiku eti 9.11.1962 okwa tile: "Nafye yo twa ningi ovaneumbo loye Omwene."

Okwa putukile mEndola pokati kovakulunhu vaye. Okwe lihonga mofikola yokaumbo mEngela okudja 1959 - 1963. Eshi a mona omhito yokutambulwa mofikola youhakuli mOnandjokwe modula 1964 okwa ti: "Aishe ohandi i dulu mwauu ta koleke nge."

Oshilonga shaye shouhakuli okwe shi yapulilwa eti 21.2.1967 mOnandjokwe, nometi 11.12.1967 okwa tameka oshilonga shotete shouhakuli mOmundaungilo. "Aame oo Omwene tume nge, osho a tumbula eshi a tumwa a ye moilonga."

Efiku eti 21.6.1969 va ninga oshivilohombolo nomumati waye Oiva Hasheela nokwa tameka vali oilonga youhakuli mEngela eti 7.1.1970.

Efiku eti 28.6.1971 otundi 9.30 yongula va pewa omaano ote-te okamati Raimo Talvi. Eti 15.11.1974 otundi 3.15 oufiku va pewa vali okamati Richard Jooste (Sello). Eti 17.3.1981 va pewa vali omaano manene okakadona Raija Hendrina Tuyakula. Meme Anna mokutala omaano oo a pewa ku Kalunga kaye, okwa tumbula ngaha: "Omwene oove wa wana shili okupewa epandulo. Omwenyo wange tanga Jehova."

Efiku eti 1.3.1982 okwa hovela vali ofikola youdalifi mOnandjokwe. Jesus ta ti: "Onda hala oku ku ninga oshiyuma shange shokuhumbatela mo," osho meme Anna a tumbula. Modula 1984 omo a yapulilwa oshilonga shaye shoudalifi.

Momudo 1985 okwa kwatwa kouyehame. Eti 5.8.86 okwa twalwa kOvenduka nokwa konakonwa komundohotola oule wovike ivali. Okwa kala mouhaku kOvenduka okudja 1986 - 7.3.1988. Eti 13.4.1988 omo a tambulilwa vali moshihakulilo mOnandjokwe, nefiku eti 14.4.1988 omo a

ifanwa metulumuko laalushe. Ohatu pandula amushe mwe tu kwafa mouyehame wameme Anna. Natango tuu inamu tu dimbwa.

O.Hasheela  
Engela



Nakusa Anna-Lusia Hasheela

hepele nodhaaniilonga moshilongo shetu.

Onkee mboka taa kongo oombapila dhuuthemba wokulanditha omakende gowalende otaye dhi mono mbala, oshoka oya talwa oyo ookuume aawanawa yepangelo nonando yoyene kaye shi wete. Ihe ngoka a hala, ndi tye nando okutunga ositola yiikulya nenge yokuyoga oonguwo, ota uhala ta pushilepo, opo a mone ombapila yuuthemba wokulanditha iinima mbyoka yaa shi omalovu.

Manga inaatu imana okwiikolola omeho omolwoshinima shomalovu — sho tu wete itaatu ningi sha shomupondo, natu kololeni omeho epangelo lyuukoloni ndyoka li li endangalati enene mokuthikama oshinima shika. Shika itashi ti inatu ninga sha (ino uvako epuko!), ihe otashi ti natu kale tu shi shi kutya ngele tatu kwatha oonkolwe moNamibia pethimbo ndika, epangelo olyo tatu kondjitha ndyoka lya hala aantu ya kolwa, opo li pangele lya taandela ondhendhu.

Okukwatha oonkolwe itashi pula owala iimaliwa, ihe otashi pula wo aalongwantu moshinima shoka. Aantu ya tya ngawo oye li peni notaa longwa peni oosikola odho ndhona dha ngamekwa? Ope na oshindji shoka tashi tompononwa owala hwepo kevi li na ompito yokweenda nemanguluko ethimbo kehe. Shila natu tyeni owala: UUKOLONI OSHIPONGA, NAA-NGOKA TE U POPILE KI IVULE NASA-TANA ngoka ihaa hendwa mutima kaantu taa pi, nonando naa kale oomiliyona.

Eputuko twe etelwa kiilumbu olya vala nokuputudha okwaathikepamwe. Oluhepo nondjala otayi thenya aantu yetu yo taa longo ngaa okuza ongula sigo okongulohi. Omalovu otaga

nuwa "okwiifudhitha" koomvulwe, kondjala nokudhipaga oonelive dhomaiuvito gondjala, goluhepo nogomahepeko taga ningwa moshilongo. Ndika etompelo lyaa shi okupopilwa monkalo yaantu taa nu nayi, ihe uukwatya wome ni loonakunwa osho tau ti.

Oololi dhoofulaha nomindongelwa hadhi yi komavigumbo ngele odha udha owala omalovu, oto tegelele aantu ya lande shike we shaa shi omalovu? Omahala gomaiyanyudho noondjugo dhoobiblioteka ngele kadhi po, owa tegelela u adhe aagundjuka peni pwa shi muundingoshono nomositola dhowalende? Ngele aanasikola otaa ndopekwa niilonga kaayi po, nena owa tegelele yu uhale taa longo shike shaa shi okuyaka aakulupe oopenzela dhawo yo ya ye koombaa ya ka nwe? Omakunya ngele kage na ohenda nesimaneko lyoomwenyo dhaantu, owa tegelele ye ga idhidhimikile ngiini, ngele itaa nu yo yaa ga mone ngele tage ya nenge tage ya dhenge? Omapulo oge li po ogendji itatu ga mana oku ga pula.

Shigwana shaNamibia, otu na ontuko mokati ketu. Natu tonateni. Ihe ontuko onene kayi shi omalovu pethimbo ndika — oyo uukoloni nuufukulume waakwiilongo mboka wa vala omalovu, wo tau fumvike esiloshimpwiyu lyoshigwana.

Itashi tu kwatha unene ngele tatu panga owala uwehame pokathimbo tse itaatu panga oshilalo shoka tashi eta uwehame. Tu kondjitheni uwehame ngaa, ihe oshilalo osho nashi kale elalakano lyotango mekonjjo ndyoka nomonkamadhala yokweetapo elunduluko tali kalelele momukundu gwomalovu.

Shekutaamba shaNambala

# SIPITO SOKUGAVA MBIMBELI



Momazuva 21 gaKudumonkuru (Mei) 1988, kwa kere ezuva lyenene moMutayingereka gwaKavango. Vantu kwa gogomokere koRupara, awo kwa tundire koyiha nayinye yaKavango va ya tambure Mbimbeli zoRukwangali ezi va ndindira nomvhura dononzi.

Etoroko lyoMbimbeli zoRukwangali kwa varekere nawa-nawa kutunda 1970-85. Vatoroki woMbimbeli ezi nava ngava zi resurura yimo va kere mosipito esi.

Mupitisili goEtoroko eli, yige musita Asser K.Lihongo, mupahukili goMutayingereka gwaKavango. Musita Lihongo aga rugana mosirugana esi kumwe nonane Tuulikki Jantunen, nomurongi Eino Kudumo.

Onane Jantunen kwa tundire koSoomi kumwe nomusita Pentti Toivanen navamwe morwaku-

kara hena mosipito esi sokufumana. Mosipito kwa kere mo marusumo-hamberero gokufumadeka Karunga. Sipito esi kwa si dene nompepe zongwa siri.

Musita Ferdie Weich, moNgereka zonoMburu, Amutjanga gepitisombunga lyovatoroki moNamibia, nage kwa wizire a ya gave Mbimbeli, kumwe nomuswamane Michael Farchie. Ogu kwa tundire kegwanekeMbimbeli moKenya pamwe namukandedi Salome.

Sipito kwa si ninkilire poRupara, apa za kara mberewa zomutayingereka gwa ELCIN (ELOK).

“Mezuva lyanaina kapi tuna kuhafa tu pandure vantu ava vana ku tutira yikorwesa mosirongo setu, eyi yinakuzonagura rudi rwetu narunye roVakavango, ru pire nondunge noukakungi. Nye tatu pandura vatumwa vetu negwanekeMbimbeli lyaAfilika lyokoMbindakano.

Tatu pandura vantu ava va tu rujanena yininke yoyiwa eyi nomuhoko detu di lironge kudiva Karunga nononkango dendi,” ka uyungire ngesi Mupahukili tate Lihongo mosipito oso.

Musita Lihongo kuna kugwederere kononkango dendi ngesi: “Ukaro womukriste naunye, kuvhura kuumanga monkango zimwe tupu. “epanduro”. Ebanduro eli, kutunda komuntu



Uumati mbuka owa tegelela nenyanyu oshituthi shegandjo lyOmbimbeli shi tameke

## EFYO LOMUSHAMANE WHISKY

Ohandi shivifa efyo lomushamane a shivika nawa Fine old Scotch Whisky, oo a manene oweenda waye momwedi oo, ehi ehauto laye le hpuma mumwe nehauto lomushamane Limosin Brand, Omushamane Brand okwa chamekelwame moshiningwanima ehi pamwe nekampanati kaye Crp Drift.

Otaku shivifiwa ne omukulukadi waye Castelo Banana nookaume kaye ngaashi Vin Coco naGranada Brand. Efundiko laye otali ka ningwa pomawendo a Tassenberg potundi 9.00 yongula. Komawendo otava ka twaiwa ko kehauto lomushamane Sangrita olo tali ka shingwa kuDry Castelo.

Ohatu indile omushamane; Vin Cola, Castelo Ment naRedheat ve ke tu fele elambo laWhisky. Eudifo otali ka ningwa komufita Lion Lager opamwe nomuyakuli waye Vin Doux. Omushamane Old Brown Chery naye opo ta ka kala.

Ohatu ka teclera yo omushamane Namaxwikamapunga Vambo Likwa, naye a holoke yo. Onde hneekela amusha omwe shuuda ko nawa shaashi osha leshelwe meenghunda-na do 8 komatango, odo da li tadi leshwa kuWindhoek Lager noshe endululwa mokomenda oyo ya li tai leshwa kuKing Korn Matombo Mamele, nokonima osha ka shivifa yo mokambiya komahola.

Okudja komawendo yukillieni kepata la meme Mukwanangobe wa Parler oko tamu ka yakulwa. Otaku shivifa ookaume kaye ovo ve li kOlange; Castelo Guava, Smirnoff, Qld Buck Gin, Windhoek Export, Windhoek Special, sha kwatela mo yo Castelo Lemon oo e li koWalvis Bay.

ALABAMA  
Engela H.P.School



Uunona moshituthi shegandjo lyOmbimbeli

“Tatu pandura vatumwa vetu nEgwaneke-rombimbeli lyaAfilika lyokoMbindakano, ei va tu rujanena yininke yoyiwa, eyi nomuhoko detu di li ronge kudiva Karunga mononkango dendi,” ka yuyunga ngesi Mupahukilisitayi A. Lihongo.

Kuku Johannes K. Nawanga, 4.5.1988.  
Okwa thigi ko oyana 5 naatekulu oyendji.

Joel Th. T. Ashipala  
Oluno Sec. School

# MERAKA LYORUKWANGALI MORUPARA

ogu tali zuvhu asi. Ame kwa hamena kwaKarunga.”

Etoroko lyoMbimbeli zoRukwangali kwa li ruganene kumwe noNgereka zaKatolika. Mosipito esi kwa kere mo vangendesi vopekepeke wonongelesa moomu; Bisofi Kleopas Dumeni goNgereka za ELCIN (ELOK) mungendesi goNgereka zaKatolika moKavango, mungendesi goNgereka za EGK, musita L.Hausiku, mungendesi gongereka Metodiste, Ludwig Ausiku yimo hena.

Mosipito kwa kere hena vanamakuto woyirongo; hompa gwaUkwangali, Ndaniyera Mipasi Sientu; hompa gwaSambyu, Gothard Aininga nahompa gwaMbukushu, A. Mayavero.

Eraka lyoRukwangali eraka lyoutatu mongereka za ELCIN. Momvhura ezi 1974, yimo va gwene Etestamende lyEpe: Elaka eli lyoRukwangali ku liuyunga moyirongo eyi: Mbunza naUkwangali.

Karunga a tungike vantu womoyirongo eyi, eyi yana gwana Mbimbeli meraka lyawo. Mbimbeli ezi kapi ana zi nepanesa moNgereka za ELCIN, nye nezi zaKatolika hena.


**Sebulon Ekandjo  
naAsser Lihongo**

## Oongalo dha zi momafumviko goonakusa yomboma mOshakati

Ongalo yotango yeti 29.2.1988 oya zile R 5 091,03.  
Ongalo ontiyali yeti 12.3.1988 omwa zile R 2 226,99.  
Kumwe:R 7 308,02

Ovayandji otatu va pandula. Ongalo oya pungulwa opo i ka longifwe efimbo layo ngeenge la fiki.

Ombelwa yoiniwe  
Omiipa



**Omusita Elia Neromba ngoka e li moshipundi shevululuko, edhina lye olya holoka mondjokona yoshilonga shetoloko lyOmbimbeli kutya oye gumwe gwoyendji mboka ya kwatha musho**



**Omusita Pentti Toivanen ngoka a kala nale omutonateishitayingeleki shaKavango, ota monika methano ndika pokati ta kundathana nookuume pethimbo lyoshituthi. Kolumoho omwayina ngoka yi ile naye koshituthi okuza kuSoomi**



**Aasamane yaKavango yi ile koshituthi shegandjo lyOmbimbeli melaka lyawo**

### Da dja kep.1

Meme Ester okwa li omulongi a pyokoka mokulonga moongundu ndhoka dhopevi. Esiku kehe okwa li a nyola shoka ta ka longa. Uunona wo uushona oku shi okukala nawo noku u heka nawa nombili. Oye a li omukokoli poskola yetu ha thikilwa kuunona auhe mbo tau zi koshikunino nomomagumbo inau mona nale aalongi.

Aalongwa ye sho nde ya lombwele kutya omulongi gwawo kee po we noita monika we muuyuni mbuka naKalunga ote ke ya tumina omulongi gwawo omupe, nando ya pewa omulongi te ya longo pethimbo ndika, natango yamwe yomuyo oya tega omulongi omupe ta tumwa kuKalunga ta zi megulu moka mwa yi omulongi gwawo Ester noku ndjakela komeho gongundu yawo. Aanelago aantu mboka taa sile mOmuwa gwawo kongashingeyi.

Tse Aalupumbu otwa kanitha gumwe gwomaatameki yomaimbilo megongalo okwa li wo oshilyo shewilikongundu lyomusiki megongalo. "Oyo otaa ka vululukwa kiilonga

yawo iidhigu oshoka iiyimati yiilonga yawo otaa yi pamwe nayo." Ehol. 14;13 (b)

**Omulongi pamwe naye  
Vaino Namukwambi**




**Omulongi Vaino Namukwambi**

# OSHILONGO SHETU: NAMIBIA

Shekutaamba V.V.Nambala

OSHITOPOLWA 2



Omwiilongi Shekutaamba  
V.V. Nambala

Otwa adhika twa popi metetekelo kutya Afrika olyo evi enene. Ngele owa mete Afrika uule walyo okuza puCape Town (kolukadhi) sigo opuCape Bizerte sha-Tunisia (kolundume), ope na uule wookilometa 8,000 (nenge oomayila 5,000). Omanga li na uunene wookilometa 7,200 (oomayila 4,500) okuza kuuzilo sigo okuuninginino (ano okuza kuSomalia sigo okuSenegal.)

Kape na ngoka ta popi Namibia ye ta dhimbwa Afrika alihe. Afrika naNamibia oyo ekuvu nela. Afrika ngele ela, Namibia ekuvu. Onkee Aayeuropa sho ya yono ombili yaAfrika, opq tuu wo pethimbo mpoka oya yono ombili yaNamibia.

Namibia oli na oombinemayila dhi thike lwopo 318,000 (ano 317,838), ndhoka tadhi ningi owala oopelesenda ndatu (3%) dhaAfrika. Namibia olyo wo evi etimulongo netitano muunene womomavi (ano iilongo) gaAfrika. Noli na aantu ye thike lwopoomilyona mbali.

Aayeuropa sho yi ihakanene Afrika, Aandowishi oyo ya hakanapo Namibia momumvo 1884. Ihe manga Aandowishi inaa hakanapo Namibia omumvo ngoka, oya tetekelwa kAatiligane ooyakwawo mboka yi ile nelalakano lyuuyendifuta, lyiipindi, lyuukongo woondjamba, naatumwa yelongo lyuukriste.

Osha li she ende ngeyi kutya momumvo 1415 Aaputu oya tidha mo Aamuhamendi (mboka haku tiwa Aamoore) mOputu (haandjika ya-Angola, ihe Oputu yokuEuropa ndjoka kwa zile Aaputu yaAngola, ano oPortugal.) Konima Aamoore sho ya tidhwa mOputu, Aaputu oya tala olyo eegululo lyoomweelo okufala ukriste (Christendom — hapamukalo ngoka tu shi uvite ko nena).

Ihe oya li yu uvite ompito oyokuninga ayehe aakriste nando inaa hala. Ombepo ndjoka oyo

ya fala Aaputu ya ye nuuyuni. Unene tuu oya li ya hala kuIndia hoka kwa li wo ya tseyo oku na iikwakulikolwa ye yi hala niidhogithi yomahoka.

Opo opulanda yawo yokuya niilongo yi pite, Aaputu oya ii ya tala kutya oya pumbwa uunongo wefuta. Onkee lwopomumvo 1400 omuna gwokombanda gwaPutu hi ithanwa Henry "Mweendifuta" okwa tungitha osikola yuunongo wefuta.

Mosikola moka omwa li mu na aanongo, e ya kongwa owina, yoonyothi, yuukaalita, yefuta, yoosikepa, nosho tuu. Omolwosikola ndjika aayendifuta Aaputu oya tumwa lwotango omumvo 1415 ya kunkule nefuta lyaAfrika kombinga yokuuninginino.

Oya yi sigo opuCeuta shaMarroco. Oya shuna ko ishewe omumvo 1419. Omalweendo ngaka oge ende taga hedhele sigo omumvo 1420 ga adha puLagos shaNigeria. Inaa hula mpoka. Aaputu taa hedha ko, ndele taa hedha ko sigo omumvo 1484 oya thiki puCape Cross komunkulo gwaNamibia.

Shika osho sha li oshikando shotango oshilongo shaNamibia sha talikwa komeho gOmutiligane. Ngoka a li ta wilike olweendo ndoka oye Diego Cao (nomadhina galwe a tseyika nago Cam, nenge Jacobus Canus.)

Ngashi twa popi pombanda kutya elalakano li-mwe lyAaputu okutaandelitha "Uukriste", aayendifuta mbaka yaAaputu oye ende taa dhike omishigakano komunkulo gwaAfrika. NaCape Cross okwa lukwa ngaaka, oshoka opwa dhikwa wo omushigakano kuCao.

Cape Cross otashi ti "okahala kevi komushigakano ke li momeya." Konima yaCam okwa landula Bartholomeus Diaz ngoka a thiki kOliindili (ndjoka e yi luku Angra Pequena ... okatulilo okashona" mOshiputu) momumvo 1487.

Omumvo gwa landula (1488) Diaz okwa thiki muCape Town shaSouth Africa (shoka a luku Ombaye yetegameno konima.) Konima ye okwe ya Caspar Vega (1534.) Konima ya Vega komunkulo gwaNamibia okwa thiki ishewe uusikepa waakongi yeliko ngaashi hoka haka ithanwa "the Grundel" omumvo 1670, "the Bode" okakwawo ke ya ko omumvo 1677, nayalwe ngaa nee. Lyo nethimbo ndyoka Oombulu dhe ya ngaa nee dhi lale Okapa momumvo 1652, mewiliko lyaJan van Riebeeck.

Konima yethimbo ele, Aatiligane sho ya kala ya nyengwa okuya meni lyaNamibia taa ziilile kefuta, oya tameke ihe okuziilila kuSouth Africa taa taagulukwa omulonga gwaOranje. Omalalakano gawo gokuya lwotango koNamibia oga lipo ogendji, ngaashi okuyaha oondjamba, okukonakona evi, okulanditha, nokutalatala ngaa nee ngele oli shi okuponokelwa li ninge lyAatiligane.

Mboka ye ya tango kuNamibia pamukalo nguka gokuziilila kuAfrika-lukadhi oyo: Pieter de Bruyan (inandi tseyo okwe ya ko omumvo naanaa guni); William van Wyk (1738); Jacobus Coetzee, omukongi gwoondjamba (1760); Hendrik Hop (1761); osheendo sha tuminwe kuSimon van der Stel gwaKapa (1762); H.J. Wikar (c.1771); Robert Gordon (1779) ngoka a luku omulonga gwaLange gu kale "Orange" sho e gu

lukile ombala yaHollanda pomimvo ndhoka. Opo ihe taku ya Willem van Reenen momumvo 1780 na 1792.

Omalweendo gAatiligane ngaka kuNamibia ogo ga fala sigo opo mpoka Engeland a tye Ombaye oye momumvo 1795 ye e yi yugileleko ngaa nee omumvo 1878 sho e yi lala. Ethembo ndika olyo ndyoka lya ningitha South Africa, nena a tye Ombaye oye, oshoka pethimbo ndyoka South Africa okwa li ta pangelwa kuEngeland sho a yugwa miikaha yaAaholanda omumvo 1808. Kape na Omunamibia a gandjele Ombaye miikaha nenge meliko lyAaingilisa. Oompata dhOmbaye itatu yi manga nadho. Okuza mpoka omeya oga tameke ihe okuya mondanda.

Omumvo 1805 aatumwa aakriste yaAaingilisa nayo wo ye ya koNamibia ya ziilile tuu kuSouth Africa. Mbaka oya landulwa kaatumwa Aandowishi mboka ya li taa longo muSouth Africa metonatele lyAaingilisa. Aatumwa mbaka yaAandowishi sho ye ya koNamibia oya mono kutya nani Namibia inali hakanwapo natango kAayeuropa.

Portugal ngoka a li muAngola pethimbo ndyoka ina itula mo a ninge Namibia oshihakanwalongo she. Oshowo Engeland ngoka a li muAfrika-lukadhi ke wete ompumbwe yokoloni manga ishewe. Ihe aatumwa mbaka inaa uva ombili kuNamibia inali kolonyekwa. Oyi indile ihe epangelo lyAandowishi li ye li kolonyeke Namibia. Mupyamunene Ndowishi kalya li evi lya hangana pethimbo mpoka, yo niimaliwa yokukaleka aantu ye kokoloni kaya li po. Onkee Ndowishi okwa ti owala aatumwa mbaka ngele oya hala epangelo lyAatiligane li kale muNamibia, naa pule Aaingilisa mboka ya li popepi muSouth Africa.

Aaingilisa ngaashi twa ti nale kutya kaya li yi itula mo ya ninge Namibia okoloni yawo, oya kutha ko owala Ombaye sho ya pulwa kaatumwa ya lala Namibia. Nomolwasho Ombaye ya lalwa 1878, yo aatumwa oye ya mo 1842.

Aatumwa mbaka yaAandowishi inaa uva ombili sho Engeland a lala owala mOmbaye. Oya tsikile nokupula epangelo lyAandowishi li ye koNamibia. Omukuluntutumi gwehangano lyAandowishi muNdowishi omusamane Frederick Fabrie okwa nyolele nokuli embo tali pula:

"Ano Ndowishi ina pumbwa ookoloni?" ongo-shipalanyolo shembo ndyoka. Lagonene kombinga yaatumwa, Ndowishi omumvo 1870 okwa hangana ongoshilongo shimwe mewiliko lyA-Bismark nomukesali Wilhelm. Shika osho nee sha fala Ndowishi a gumwe mokuhala ookoloni.

Oshigongi wo shomuBerlin shomumvo 1884/85 osha kwatha wo moshinima shika. Onkee momumvo 1884 Namibia olya ningwa onzimbogo yuukoloni wAandowishi. Okuya kwAandowishi muNamibia nokukalamo kwawo kwoomvula omilongo ndatu, itaku ka dhimbiwa nando mondjokonona yaNamibia, oshoka Aandowishi muule wethimbo ndyoka oya dhipaga Aanamibia ye vule 80,000. Uunene tuu Aanamibia sho ya kala inaa hala ya pangelwe kaa-kwiilongo.

(Taku tsikilwa)

Omatompelo guunona sho wa thigi po oosikola okuza 14.3.1988 sigo omuMai, oshinima sha taambwa ko kaavali moshitopolwa shOwambo. Oyendji oya tompe-lwa, kutya uunona otau kongo egameno nombili moosikola dhawo, shimpa tuu ookamba dhaakwiita tadhi shuna kokule. Uunona owa tsikile ko kepulo ndyoka lya kala moyendji yomoshitopolwa shika, aakwiita ya SA ya ze mo moshitopolwa shika nenge muNamibia nokuli.

Aavali yaanona taa sikola Ponhofi moshigongi shawo 28.3.1988 momuhandjo gwasikola ndjoka, oya tokola ngomuntu gumwe ya ti: "Tse twa loloka okulila oosa dhuunona womosikola ndjika, onkene uunona wetu itatu ke u tidha mo momagumbo, ngele okamba inayi za po.

Aavali yaanona taa sikola mOseko yaUtapi mOmbalantu, nayo osho ya li ya popi. Moshigongi shawo 20.4.1988 poKamhaku, oya tokola newi limwe, uunona wawo u kale manga momagumbo, manga tau tegelele okamba yi ze po.

Oshigongi shaasita yoshitayingeleki shUukwanyama 17 - 19.5.1988, mEngela, oya tungu omushangwahokololo moka ya holola omadhilahilo gawo moshinima. Oya ti:

"Nope he na eendaka mbali, fye ovayakuli vopamhepo voshiwana eshi, otu li kumwe filufilu novahongwa vomoPonhofi novadali mokiindila edjepo lokamba."

Aawiliki yOongelesi oonene moshitopolwa shika nayo oya kongele ompito yomutumba gwowina opo ya holole wo omakankameno gawo moshinima shuunona. Ongeleki yaAnglikana, yaKatoolika kaRooma noya ELCIN, konima yomutumba gwadho 25.5.1988 mOshikuku, odha nyola omushangwahokololo, moka dha tumbula ngeyi:

"Ongaakalelipo yOongelesi dhetu moshitopolwa shika shokuumbangalantu waNamibia, o-twa sa oluhodhi olunene omolwenaipalo lyonkalo. Onkee otatu indile oomwamemengeleki

# Olye ano ta pangula uunona sho wa thiga po ootundi?



moshilongo, neindilo ndika li pitile mOraata yOongelesi muNamibia (CCN), opo nadho wo dhi tale oshinima shika."

Omushangwa ogwa hulithwa nomatumbulo gekumidho komagongalo, kaavali, kaalongi nokuunona, opo ya kale natango mombepo yegundjilo nokutsikilwe nomagalikano.

Oosikola dhi vule 40 mwa kwatelelwa adhihe oonene moshitopolwa shOwambo, odha kala dha mwena, omolweu vitopamwe lyaanona mboka ya za po momihandjo omolupopepi wookamba dhaakwiita nomihandjo dhawo.

## OLUHINDO LWOMAKAKUNYA MOSIKOLA YALUNO

Manga uunona tau ende tau ndonda u shune moosikola, konima yiwike iyali sho wa thigile po iipundi omoluumbanda wookamba dhomakakunya popepi noosikola, omakakunya ge thike lwopomulongo ogi iteyele uusiku momuhandjo gwOseko yaLuno e taga halutha aanasikola. Osha ningilwe eti 2.6.1988.

Pauyelele mboka wa thiki mombelewa yOmukwetu, omakakunya oge ya taga lombwele uunona, kutya go aakwiita ya SWAPO noga hala ga thindikile uunona kuAngola. Oga thikile momuhandjo gwaakadhona.

Konima oga tameke okudhenga uunona noku u hilagulila pondje, ge u pitithe olugumbo lwasikola. Ekwatho lyaanasikola aamati pamwe nomukuluntu gwasikola sho lya ka thika, olya adha uunona une wa yiwa nale nawo momilema. Konima uunona utatu owa galuka ko nakanona kamwe oka kala kaa lwetike sigo ongula sho kwa shi.

Mokati komakakunya ngoka omwa dhibululwa ekakunya limwe; Lyakwata (oKoevoeta) naSakaria Nambala. Pahokololo lyombelewa yomusamane Kalangula, oshinima shoka osha gandjwa miikaha yaapolosi.

## Aanasikola Ponhofi ya taamba ko ethaneko

Ethaneko lyoshigongi shaataleli pamwe naakuluntusikola 24.5.1988 aanona yomosikola yaPonhofi ya halakanithwe noosikola oonkwawo nolya kolekwa koshigongi shaavali yoposikola ndjoka sheti 28.5.1988, olya taambwa ko kaanasikola.

Pethimbo lyelongekidho lyoshinyolwa shika, Amushanga gwombelewa pOhangwena, omusamane Lukas Nghitukwa, ota ti uunona oku u lwete tau ile ookofa dhawo mosikola ndjoka u ka tameke ootundi dhawo mpoka tau tumwa. Omukuluntusikola ndjoka, ina monika kOmukwetu moshinima shoka.

Ehokololo olya ti, ongundu onti-8 otayi taambwa kEnhana manga oongundu onti 6 na 7 tadhi halakanithilwa pOmungwelume nEngela. Aalongi yawo nayo otaa topolelwa uunona wawo, taku talwa pamagano ngoka omulongi e na okugandja kaanona mboka.

Kombinga yomalongekidho gomakonakono, unene ositanda 8, ndjoka ya adhikile inaayi mona oonomola dhomakonakono pahokololo lyomuwiliki gwelongo omusamane Denis Nandi, opo taa tala kutya otapu monika ondjila yinipo. Ashike omupopihapu ota ti, natango tuu aavali onkene taa tegelele eyamukulo li ya zile natango komusamane P.W.Botha kombinga yezopo lyokamba, oshoka eyamukulo ndyoka lya gandjwa aavali oya nyengwa oku li uva ko.

Sebulon Ekandjo



Nakusa Edward Kalumbu

\*\*\*\*\*

Edward Kandali Kalumbu gwomvula yimwe noomwedhi heyali, 6.5.1988 ombaadhihila moshipangelo mOndjokwe. Okwa thigi ko aakuluntu ye naamwayina 3.

Egumbo lyatate Paulus Kalumbu Uukwiyuushona

# OMEUMBO LOHAMBWA

Omukwetu ngeenge ou na ehalo lokutambula, ohandi ku pe shimwe shomounyuni waNakanyenye "Omeumbo lohamba." Mounyuni waNakanyenye okwa li ku na ohamba i na ouhamba munene novanhu vahapu, omo va kala tava tekulwa, omolwaashi ohamba oya li ohamba noi na outeku lelalela. Omwa li yo oukadona vahapu tava tekulwa, kamwe komuvo edina lako ola li Ndopovanhu.

Ndopovanhu okwa li e na ewi, ondaka yonghenda ye iha popyapopya unene. Omolokumwena nonghenda yaNdopovanhu, vakwao ove mu etela odino noku mu lya oshipungo nova li ve mu luka edina lolushindo, loupote Mbwabwamatolo.

Ova kala have mu diladilile omupya, a tewe mo mouhamba wohamba. Efiku limwe oukadona okwa li tava li omakunde omufuula, oipeta yomakunde avo ove i ndubila mekolo laNdopovanhu, ou ve mu luka Mbwabwamatolo, po pomakolo avo tapa kala ashike oipeta ishona, osheshi okuhole unene okulya.

Efiku limwe tava tu oilya poshini. Kamwe oka teya omushi ndele vo ova ya kohamba: Tatekulu, ou ina wapala okukalela ohamba, shaashi ota teyaula omishi, osho ngaho va kala noku mu shinda.

Efiku limwe Matolo okwa li a ya a ka tala omeva kediva. Kamwe oka endelega divadiva oshinaupote lelalela nde taka kufa okakaiwa kaMatolo ngaashi have mu ifana, aka kwa li ha manga nako eexwiki daye nde taka i ka ka nwe mo oshikundu shohamba. Ko okakayiwa take ka fiye po, opo ohamba i dimbulukwe kutya oshikundu shayo osha nuwa mo kuMatolo.

Omupya munene inaka dimbulukwa okuyuka omhadi yako yeefindja. Vo ova li ve li pohamba efimbo alishe, ndele inava koneka ohamba, kutya oi na omamumesho manene haa mono kokule nomatwi male haa udu omawo ayesho moshilongo shayo ashishe.

Ndopovanhu oye nga ou ha ifanwa Mbabwamatolo aishe ei ha ningilwa kuvakwao, okwa kala e he i udite elao lokukala mouhamba nande ohamba inai mu ningila owii washa. Shaashi ina okwa li kokule okwa li ngaa e linekela po omukulukadi umwe, oye ngaa nee ina ekwafo lotete, ou a kala he mu tu omukumo, opo a diinine okukalela ohamba nekumaido ola li ngaha.

Kamwange, onde ku linekela nawa lela nokutya ove oto udu ko ngeenge hai ku lombwele. Tala utale, oshilongo nounene washo ashishe oshohamba novanhu atushe naashishe shi li mo. Dimbulukwa yo kutya ohamba oi na eenghono, oi na omesho manene haa mono apeshe.

Oi na omatwi male haa udu ko ashishe. Ino tila omupopyo nomalundilo avo, elao linene navo ovatekulwa mo. Ndele kave shi ovadalwa, ino ninga omwenyo mwii molwaashi kave ku hole, ahowe. Ndele ninga omwenyo mwii ngeenge ohamba kai ku hole.

Nye omu li pohamba, efimbo keshe hamu nyakukilwa okwiifanwa ovapiya vohamba.

Omu shi oupuna wohamba, ndele kamu shi eenghedi dohamba. Voo ove ku dina nove ku tonda omolwombili nonghenda yoye, ndele kave shi shi kutya vo eshi ve li mouhamba ove li mo omolwombili nonghenda yohamba. Kamwange, ove omunhu omunelao ngeenge to diinine okukalela ohamba noto longo ashishe tashi i wapalele. Kalela ohamba, kala mouhamba nombili.

Omukwetu okandjila aka okakulu konalene komounyuni waNakanyenye, ko okale, omupya wako ohaka endwa kolupadi omolwaashi nale-nale oyeendifo kaya li ko. Ngeenge hatu dulu okweenda kolupadi nomhito oye shi pitika hatu twikile okweenda komesho fiyo twa fika pepata laNdopovanhu, ou kwa li ha i fanwa Mbwabwamatolo omuneumbo lohamba.

Ngh. Fikameni

## Oomwedhi mbali adhi-ke pokati opo.....

Opu na ashike oomwedhi mbali pokati Namibia li dhane oshituthi shoovvula 10 okatokolitho 435 kiigwanahangano kethaneke lyemanguluko lyoshilongo shika sho ka li ka ziminwa 29.9.1978. Osha yela Aanamibia otaa tsikile nepulo lyawo okuligamena emanguluko li ya zile pondje.

Ihe Ruslanda oku na ethaneke lya simana kombinga yoshituthi shoka. Ye ota ti, esiku ndyoka olyo nali kale lyetameko okatokolitho sho taka tulwa miilonga. Onkundana ndjika oya zi moonkundathana dhaaleli yoshilongo shoka pamwe naAmerika, ndhoka dha ningi omasiku tadh i pwakele.

Ethaneke ndyoka nando kape na ngoka te li koleke, kape na wo ngoka e li ekelahi. Ayehe, Ruslanda naAmerika, oya hala okuhulitha po iita yoomvula 13 muAngola nambyoka ya kondjo muNamibia omimvo 22.

Shoka tashi kongwa ya tse kumwe musho, osho ashike omukalo nethimbo uuna tashi tamekwa. Ruslanda okwa thaneka 29.9.1988 esiku lyehanganitho lyomimvo 10 dhoshitokolitho sheutho lyemanguluko lyaNamibia. Oonkundathana onkwawo otadh i ka ningwa natango mbala omwedhi nguka, uuna taku ka uvika ishewe nke ne ya humu komeho nenge ya nyengwathana.

Petameko lyomwedhi nguka, SA okwe shi yelitha, nokutya ye ina hala okuyona oonkundathana ndhoka dhi li po ngashingeyi, omolwomai-nyengo ando gAacuba mboka taa hedha popepi nongamba yaNamibia. Pahokololo lye, Aacuba oye li natango ookilometa 50 okuza pongamba yaNamibia.

## Ombili tate Ambata

Otatu endulula etseyitho lyanakusa ta landula mpaka nokugandja ombili komusamane Ambata omolwevudakano lyetseyitho moshifo shajuanuali 30, 1988.

Meme Fudheni-Saima Ilea (51), Oshitutuma, Ukwambi, okwa mana oondjenda 22.11.87 muuwehame wethimbo ele. Okwa thigi ko omusamane gwe naanona 11. Nakusa osikola yokagumbo okwe yi pitile 1959 mOnimwandil. Oya hokana naFilemon Ambata 9.1.1962.

Nakusa okwa longo osikola yoSoondaha nopoompito dhimwe okwa li wo ha kwatha mokuwilika oongundumbimbili. Otatu pandula oondohotola naapangi mOnandjokwe nosho wo mOshakati sho ya yakula muunamiti.

Amuhe mwi ile tu topolelathani oluhodhi noku tu yakula, otwe mu pandula unene. Kalunga ne mu yambeke.

Filemon Ambata  
Ondangwa

## KOTOKA SHIWANA SHANAMIBIA

Ame onda li umwe waava va li koshooongalele shoministeli omhitifi yOwambo, Peter Kalangula. Ndele oshooongalele sha tya ngaha osha li shiwa kuvahapu moNamibia. Kwaame mwene ohandi diladila kutya itashi tungu nande.

Ngeenge Kalangula okwa ama kombinga yaSWAPO, omolwashike oyoongalele ei ha ningi ihai piyanekwa, yoo ihai hanaunwa po ngaashi SWAPO hai ningilwa?

Omolwashike Kalangula ngeenge okwa ama koshiwana, ndele oku na eumbo la dingilitwa kokamba yomakakunya? Shaashi omakakunya oo naana e li omutondi wovakalimo vomoshilongo e shi, Namibia.

Tala shiwana shaNamibia, kotoka oto pukifwa. Ino tambula ko keshe shimwe to lombwelwa, shaashi epangelo laSouth Africa otali pukifwa ovanhu nola pukifa nale vahapu nokuli. Hano lungama, SWAPO oye omukondjelimanguluko washili.

Lungameni Kotokeni  
Ondangwa



Nakusa Mauritius Avula

## A LYATWA PO KOMAKAKUNYA

Omusamane Mauritius Thomas Avula (35) okwe tu thigi po meso lyombaadhilila 4.5.1988 sho oshihauto shoka a li ta hingi sha lyatwa po komaloli gomakakunya pokati kOshakati nOndangwa. Nakusa okwa li e li mondjila u uka kOvenduka. Okwa thigi ko omuselekadhi noyana aakadhona yane. Efumviko lye olya ningilwa pongeleka yaAnamulenge, mOmbalantu.

Omaso goludhi nduka ogi indjipala, unene kuumbangalantu waNamibia. Elenga ekuluntu lyaMbalantu, omusamane Oswin Mukulu, okwa pangula nonyanya ilonga mbyoka yi nyanyalitha yomakakunya nokwa popi pehala lyaMbalantu poshituthi shefumviko lyanakusa, kutya okatokolitho 435 kiigwana ya hangana ka tulwe miilonga opo omaso goludhi ndoka ga mone chulilo muNamibia.

Otatu pandula kwaayehe mboka ye tu hekeleke moluhodhi ndhoka olunene noludhigu lwanakusa Avula.

Theodora Nandjia  
Ovenduka

## ONTANDA YAANANDJOKANA MONGWEDIVA

Omasiku 15-17.5.1988, aanandjokana otwa li twa gongala mOngwediva montanda tayi mwenyeko ondjokana, yo tayi hwameke ohole yaanandjokana. Otwa li omagumbo ogendji ngaa, ihe oshingongi osha kala shi li mombepo yimwe. Otwa likola mo oshindji tu shi oku shi longitha, notashi ke tu kwatha.

Unene chungomwenyo otwe li mona. Otwa zi ko twa tekela nawa. Okwa li twa fa tatu ganya, ihe ngashingeyi otwa ziza nawa noinatuna hala nando esiku limwe shi tu pitilile po.

Onkee aamwameme aanandjokana uuna tamu uvu ontanda ya tya ngeyi, ino etha yi ku pitilile po, opo u ki italele ko ngoye mwene. Otandi indile ardo yi kale hayi ningwa lwaali momumvo ngele otashi vulika. Ontanda oya li noonkundathana oombwanawandhoka tadhi tungu ondjokana, monkalamwenyo ompe.

Asser M. Luuli  
Oshakati

## ESO

Omwene okwa dimbula tatekulu Moses Kalondokwa (120) 29.4.1988, mOhamuti mOukwanyama. Eimbilo 133.

Neckson T. Nestor  
Ohamuti, Omutundungu

+++++

Moses Ndemuweda Hamupolo, momukunda Okadila, eongalo Ecdama, 10.3.1988, okwa fiya po ovana 16 nomufiyekadi.

Olivia Hamupolo  
Mweshipandeka

+++++

Lebeus-Valungameni Nepela (19) mEenhana, 9.4.1988. Okwa fiya ko he naina novamwaina. "Omwenyo wange oKristus, nokufya oko elikolo." Eimbilo 523.

Kristofina Nd. Ndiwakalunga  
Shitwa Sec. School

+++++

David Hallundu Wanakashona Kaluvi (113) 29.5.1988. Okwa fiya ko omufiyekadi novana vane novatekulu 29 novatekulululwa 19.

Adolf Sh. Kaluvi  
Windhoek

+++++

Frederik E. Hango (34) megongalo Uukwiyuushona, 16.4.1988. Okwa thigi ko yina naamwayina 2. Eimbilo 644 na Eps. 23.

L.T. Amadhila  
Uukwiyuushona

+++++

Feni Nefundja Ruben 13.6.1987. Okwa thigi ko omulumentu gwe noyana, mOndjora mUukwambi. Joh 10:11,27.

N.Rosalina Shilongo

+++++

Ndinela Hamukwaya (104) Ouhongo mOukwanyama, okwa xulifa 20.4.1988, nokwa fiya ko ovana 6 novatekulu inava shilvika.

## Alweendo Neputa

## Ondjokonona yanakusa

Nakusa kuku Abner Alweendo Neputa, okwa valelwa momukunda Okahwa, moshilongo shaMbandja. Aakuluntu ye oyo Alweendo, nayina Katuwana kaShimanya. Abner sho a ningi oomvula 20 lwaampono, okwa kutha omumwayina Johannes Mbwaile yaNeputa noya yi kUukwanyama. Osha li omuuyuni womukwanilwa (omupangeli) Mandume gaNdemufayo. Oko ya kala namumwayina sigo omukwanilwa Mandume ota si 16.2.1917.

Okwa tokola natango opo ya taikile ya ye namumwayina kOndonga muuyuni womukwanilwa Kambonde kaMpingana. Oomvula hadhindji omukwanilwa Kambonde nguka a li ta pangele ethimbo ndiyaka naye a mana oondjenda. Abner a kuthwa po komukwanilwa Martin Kadhikwa a kala naye. Omukwanilwa okwa lombwele Neputa ta ti:

Neputa, inda u ka konge eputu lyoye. Neputa okwa kongo eputi ndyono hali ithanwa ngashingeyi Ondangwa. Omukwanilwa okwa ti Neputa ne li keelele, nosho a ningi.

Okwa kongo omukadhona gwe Alisa Kambala gwomomukunda Onambango mOndonga. Neputa okwa shashwa aniwa komusita August Pettinen (Nandago). Okwa hokana omukadhona gwe. Ongombe yohango okwe yi pewa komukwanilwa hekulu Martin Kadhikwa, ngoka a kala he nongoyina mOndonga.

Kalunga okwe ya pe omagano mondjokana yawo gaanona 10. Yaali Kalunga okwe ya fala nale mevululuko lyaana yaKalunga. Aakiintu yane naalumentu yane oyo ya kalapo. Johannes Sheetekela, Sesilia Katuwana, Sakaria, Filippus Ndanyengwa, Johanna gwAanaka, Beata, Lukas, nonkelo Emilia Dhalondoka, ihadhi yi iita.

Oyana ayehe mbano oye mu eteleko aatekulu 104. Aatekulu taye mu eteleko aatekulululwa 64. Mbaka taye mu eteleko aatekulululwa 21. Kalunga na hambelwe. Neputa okwa thigwapo komukulukadhi gwe 16.9.1971.

Neputa a kala muuwike we oomvula 17 megumbo lye. Okwa kwatwa kuunkundi muule wiiwike iyali megumbo, no mwana Beata okwe mu hungu nokuli sigo ethimbo ndyoka a hulitha oondjenda dhe eti 28.4.1988 nokwa ka vululukwa kilonga ye ayihe. Okwa si e na oomvula 140. Omuwa oye omusita gwandje, Eps. 23.

Ruusa K. Nehafo (Neputa) Uutsi



Nakusa Abner Neputa

## RUDOLF BAHM

### Omupangeli gwootundi

### MOSHAKATI

*Mpaka otandi tseyithile aayakulwa yetu ayehe, kutya iilonga yokupangela ootundi, okulanditha po oompe nokwoopaleka ndhoka dha teka, okutula ko omakende nuumanya, itatu yi longele we metungo JAMAICA INN.*

*Ngashingeyi otu li mpaka mOshakati metungo lya ENOK (BBK), mpeya hapa kala pwa thikama aluhe omaloli goeiskilima (Roomys). Shika otashi ti elalakano mpaka, oku ku etela eyakulo ndika popepilela, waaha pumbwe we okufala nenge okutuma ootundi dhoye kUushimba.*

*Ohatu landitha wo ootundi onkulu kondando yi li hwepo, onkene tu talela po ngele to piti pOshakati.*

Mat. 7:13-14.

E. Nd. Nakashona  
Tsumeb

+++++

Henok H. Nakashona (63) Ouhongo,  
3.5.1988. Ehekeleko Heb. 12:1-11.

Elieser Nd. Nakashona  
Tsumeb

+++++

Teofilus Angula Mwaninga (65)  
momukunda Ombalamumbwenge,  
mOshigambo. 27.4.1988. Okwa thigi

ko oyana yaali. Eimbilo 651 na Eps.  
27:14.

David N. Nambili

## A mangululwa kodolongo

Omulongifikola pOshimwaku, Jason Shikomba oo a kwatelwe 19.1.1988 okwa mangululwa eti 16.5.1988. Okwa enda peenehele tadi landula: Ohangwena, Okakwa, Okapale kaNdangwa, Oshakati, Ovenduka, Seeis nOsire. Tangi unene komailikaneno eni. Eps.46:2.

Jason Shikomba



## VACANCY VACANCY VACANCY VACANCY

The Council of Churches in Namibia has a vacancy in the Finance Office for the position of Deputy-Treasurer.

The successful candidate should:

- ★ have a post matric bookkeeping qualification or matriculation plus at least two years practical experience in bookkeeping;
- ★ be able to do books up to the trial balance
- ★ be reliable and responsible with leadership qualities.

For enquiries contact:

Mr. Vezera Kandetu  
Tel 37510 during working hours or  
P.O. Box 41,  
WINDHOEK 9000

DEADLINE: 17 June 1988 .....

## EPANDULO LYA ZI KAAYE-LELE KOMUTSEGWONIME

Otatu pandula nepandulo lyaa na oongamba oomeme yokOvenduka mboka yi ihepeke shili oku tu tumina ilizaloma nilmaliwa R6,00. Oya li wo ya tumu ondjato onene ya zi kumeme Elina Moses, ndjoka kuku Ester Iyambula a ningi elago sho oye e yi likola.

Otatu pandula wo tatekulu A.Shejavali negumbo lye, tate Naanda negumbo lye, meme Toini Ntinda negumbo lye, ayehe oye tu kwatha. Twa pandula noonkondo, meme Rakel Shifotoka nameme Rakel Nekwiya.

Katu na sha oku mu ningila aaholike, Kalunga Tate oye ne mu yambeke. Na yambeke wo egongalo alihe IyaVenduka.


Peha IyAayelee mOmumsegwonime  
Tuuli E. Mwashekuna  
naMagano Namwele

## YA DHIGININWA NATANGO NENGE YA KANA

Kotoba 1979 — Festus Nakawa  
31. 5.1979 — John Nakawa  
5. 5.1980 — Toivo Shilongo  
4.10.1980 — Marcellinus Shilongo  
Juni 1979 — Matias Ashipembe  
4.10.1980 — Modestus Ipinge  
18. 9.1978 — Ndeifeka Erastus  
18. 9.1978 — Rufus Amukuhu  
18. 9.1978 — Mutumbulwa Amukuhu  
10. 9.1981 — Kristof I.Shikongo  
19. 1.1981 — Filemon likela  
4.9.1985 — Markus Paulus  
28.11.1986 — Ruben Edmund  
Kotoba 1987 — Tomas lipito  
8.10.1987 — Mateus Handjaba  
3.12.1987 — Shipandeni Mupolo  
22.7.1987 — Mateus Mudjanima  
7.10.1987 — Jason Angula  
20.1.1988 — Heikki Shililifa  
17.3.1987 — Natanael Shikongo  
27.11.1980 — Andreas Kashikola  
27.11.1980 — Teofilus Mateus  
27.11.1980 — Mateus Jesaja  
29.6.1985 — Amutenja J. Ashipala  
26.3.1987 — Protasius Leevi  
3.7.1987 — Abner Shikesho  
22.7.1987 — Stefanus Nghifikwa  
Juni 1981 — Simeon Nehoya  
19.11.1988 — Daniel Israel  
20.1.1988 — Natanael Ndatyapo  
19.1.1988 — Julius Kapula  
20.4.1988 — Paulus Shilule  
20.4.1988 — Erasmus Hendjala  
20.4.1988 — Salomon Kankono  
20.4.1988 — Haidiwa Filemon  
20.4.1988 — Aaron Haufiku  
20.4.1988 — Frans Hango  
14.1.1988 — Gideon Kampulu  
19.1.1988 — N.S.Ndatipo  
19.1.1988 — Daniel I. Namwandi  
19.1.1988 — Albine Mulyau  
20.1.1988 — Delfine Abraham  
21.1.1988 — Natanael Stefanus  
19.1.1988 — Moses Erkki  
20.1.1988 — Shipingana Shivute

20.1.1988 — David Haikonda  
19.1.1988 — Johannes Nekongo  
20.1.1988 — Immanuel Shivolo  
20.1.1988 — Salom Uusiku  
20.1.1988 — Kandenga Herman  
18.1.1988 — Johannes Nande  
18.1.1988 — Ndeshaanya shaKanana  
18.1.1988 — Jeremia Nandjebo  
18.1.1988 — Shaamena Shikungunya  
18.1.1988 — Shuudifonya Haufiku  
26.12.1987 — Silas (Kamule) Kandenge  
Januali 88 — Linus Matongo  
20.1.1988 — Lukas Nghipandulwa  
14.1.1988 — Ananias Uutoni  
26.9.1987 — Edward H. Haipito  
17.12.1987 — Josef Dumeni

Ndhindhilika: Ngoka wa tseya gumwe gwaantu mbaka, kutya okwa manguluka, onawa u tseyithile ombelewa yOmukwetu mbala. Tangi kekwatho.



## O M U K W E T U

Oye oshifo shOngeleki Onkwaevangeli paLuther yomuSWA/NAMIBIA.

Ohashi nyanyangidhwa mOshinyanyangidho shOngeleki mOniipa.

Omukuluntu gwoshifo omumbisofi Kleopas Dumeni.

Amushanga gwoshifo omusita Sebulon Ekandjo.

Ondando yOmukwetu muNamibia naSouth Africa R6,00 komumvo.

Palwe muAfrica R10,00 nokombanda yomafuta R14,00 komumvo. Mondhila R17,00.

Oondando nomambesitelo agehe naga tumwe kOmukwetu, Oniipa, P/Bag 2013, Ondangwa, 9000.

ELOC PRINTING PRESS  
PRIVATE BAG 2013, TEL. (06762) 11, TELEX 56-3257 WK  
SWA/NAMIBIA